

Na osnovu člana 5. Zakona o Budžetima u Federaciji Bosne i Hercegovine („ Službene novine Federacije Bosne i Hercegovine“ , br. 19/06, 76/08, 5/09, 32/09 i 9/10) i člana 15. Zakona o principima lokalne samouprave u Federaciji Bosne i Hercegovine ("Službene novine F BiH", broj:49/06), Općinsko vijeće Tuzla, na sjednici održanoj dana _____ 2010. godine, donosi:

ODLUKA

o izvršavanju Budžeta općine Tuzla za 2010. godinu

I – OPŠTE ODREDBE

Član 1.

Ovom Odlukom uređuje se struktura prihoda i primitaka, rashoda i izdataka Budžeta općine Tuzla za 2010. godinu (u daljem tekstu: Budžet), njegovo izvršavanje, prioriteti plaćanja, obim zaduživanja i garancije, upravljanje javnim dugom, prava i obaveze korisnika budžetskih sredstava, ovlaštenja Općinskog načelnika, općinskih službi i drugih organizacionih jedinica, kao i druga pitanja u izvršavanju Budžeta za tekuću godinu.

Član 2.

Budžet je procjena godišnjih prihoda i primitaka, te utvrđenih iznosa izdataka i drugih plaćanja općine, koji donosi Općinsko vijeće.

Budžet se odnosi na fiskalnu 2010. godinu, koja počinje 01. januara, a završava 31. decembra 2010. godine.

Član 3.

Budžet se sastoji od općeg i posebnog dijela i plana razvojnih programa.

Opći dio budžeta sastoji se od računa prihoda i rashoda.

Posebni dio budžeta sastoji se od plana rashoda i izdataka budžetskih korisnika raspoređenih u tekuće i kapitalne izdatke za tekuću budžetsku godinu.

Član 4.

Plan razvojnih programa iz stava 1. člana 3. ove Odluke sastoji se od programa budžetskih korisnika koji sadrže:

- naziv programa
- opis programa
- potrebna sredstva za provođenje programa po izvorima prihoda,
- godine u kojima će rashodi za programe teretiti budžete slijedećih godina (višegodišnji investicioni programi) i
- druge elemente koji su značajni za provođenje programa

Član 5.

U slučaju usvajanja višegodišnjeg investicionog programa iz prethodnog člana, kapitalni izdaci smatrat će se budućim opterećenjima budžetskih pozicija prema kriterijima vremenske dinamike utvrđene u investicionom programu.

Član 6.

Svi javni prihodi i primici Budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na depozitni račun općine Tuzla i iskazuju po izvorima iz kojih potiču.

Prihodi ostvareni po osnovu Zakona o građevinskom zemljištu („Službene novine Federacije BiH“, broj: 67/05) uplaćuju se i evidentiraju na posebnom računu općine Tuzla “Sredstva za uređenje gradskog građevinskog zemljišta“ i koriste se za kapitalne i tekuće izdatke u oblasti komunalne infrastrukture i izradu projektne dokumentacije, u skladu sa Zakonom o prostornom uređenju ("Službene novine TK", broj:03/05).

Član 7.

Prihodi ostvareni po osnovu Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ broj:29/03 i 22/06) uplaćuju se na depozitni račun općine Tuzla i koriste u skladu sa Odlukom o uslovima i načinu korištenja sredstava po osnovu posebne naknade za zaštitu od prirodnih i drugih nesreća („Službene novine Federacije BiH“ br.46/05 i 61/07).

Član 8.

Budžetsko računovodstvo se zasniva na računovodstvenim načelima: tačnosti, istinitosti, pouzdanosti, sveobuhvatnosti, pravovremenosti i pojedinačnom iskazivanju poslovnih događaja, te na međunarodnim računovodstvenim standardima za javni sektor.

Budžetsko računovodstvo se vodi po načelu dvojnog knjigovodstva i na računima kontnog plana budžeta.

Član 9.

Priznavanje prihoda i primitaka, te rashoda i izdataka putem sistema Glavne knjige provodi se po načelu modificiranog nastanka događaja.

Prihodi i primici priznaju se u onom periodu kada su mjerljivi i raspoloživi, to jest kada su uplaćeni na račun budžeta.

Rashodi i izdaci priznaju se u onom periodu kada je obaveza nastala za plaćanje.

II - IZVRŠAVANJE BUDŽETA

Član 10.

Sredstva Budžeta osiguravaju se budžetskim korisnicima koji su u posebnom dijelu budžeta određeni za nosioce sredstava na pojedinim pozicijama.

Korisnici koriste budžetska sredstva samo za namjene koje su određene budžetom, i to do visine utvrđene u njegovom posebnom dijelu.

Član 11.

Sredstva budžeta koriste se za finansiranje poslova, funkcija i programa općinskih službi za upravu, stručnih službi, upravnih organizacija, javnih ustanova i ostalih čije je finansiranje iz budžeta predviđeno posebnim propisom (u daljem tekstu: korisnici).

Općinske službe koje u svom budžetskom razdjelu sadrže potrošačke jedinice, budžetski su za njih nadležne.

Član 12.

Službe i drugi budžetski korisnici odgovorni su za potpuno i pravovremeno prikupljanje i uplaćivanje vlastitih prihoda i naknada iz nadležnosti službe na račun javnih prihoda Budžeta općine Tuzla.

Budžetski korisnici odgovorni su za zakonitost, svrsishodnost, efikasnost i za ekonomično raspolaganje budžetskim sredstvima

Član 13.

Korisnici koriste sredstva Budžeta u skladu sa svojim godišnjim finansijskim planom, uzimajući u obzir dinamiku priliva sredstava u Budžetu.

Član 14.

Budžet se izvršava u skladu sa njegovim likvidnim mogućnostima po slijedećim prioritetima:

1. otplata duga i kamata,
2. grantovi za jednokratne pomoći u oblasti socijalne i boračko invalidske zaštite,
3. materijalni i drugi troškovi neophodni za rad općinskih službi,
4. plaće i naknade zaposlenih,
5. naknade za rad u Općinskom vijeću i radnim tijelima Općinskog vijeća,
6. tekući izdaci za komunalnu infrastrukturu,
7. kapitalni izdaci za komunalnu infrastrukturu i
8. ostalo

Član 15.

Postupak nabavke roba, usluga i ustupanja radova mora se obavljati u skladu sa Zakonom o javnim nabavkama BiH („Službeni glasnik BiH“, broj: 49/04, 19/05, 52/05, 08/06, 24/06, 70/06 i 12/09).

Član 16.

Hitni i nepredviđeni izdaci koji se pojave u toku budžetske godine podmiruju se iz sredstava Tekuće rezerve utvrđenih u Budžetu.

O korištenju sredstava Tekuće rezerve, na osnovu zahtjeva odlučuje Općinski načelnik, a po dobijanju mišljenja od nadležne službe.

Budžetsko izdvajanje za Tekuću rezervu ne smije preći 3% ukupnih prihoda, isključujući primitke.

Služba za budžet i finansije obavezna je tromjesečno izvještavati Općinskog načelnika o korištenju sredstava Tekuće rezerve.

Općinski načelnik polugodišnje izvještava Općinsko vijeće o korištenju sredstava Tekuće rezerve.

Član 17.

Ako se tokom godine, na osnovu zakona ili drugih propisa poveća nadležnost korisnika, što zahtijeva povećana sredstva, ili se osnuje novi korisnik, sredstva za njegove troškove mogu se osigurati iz Tekuće rezerve budžeta, a odobrava ih Općinski načelnik.

Ako se tokom godine, na osnovu zakona ili drugih propisa umanja nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove troškove prenose se u Tekuću rezervu budžeta ili na korisnika koji preuzme njegove poslove.

Član 18.

Općinski načelnik može na prijedlog budžetskog korisnika, donijeti Odluku o prestrukturiranju rashoda u okviru ukupnog iznosa odobrenog za budžetskog korisnika, a najviše do 10% ukupno odobrenih rashoda za budžetskog korisnika.

U okviru odobrenog Budžeta, preraspodjela sredstava iznimno je dozvoljena između budžetskih korisnika.

O preraspodjeli iz prethodnog stava odlučuje Općinski načelnik na prijedlog Kolegija Općinskog načelnika.

Član 19.

Pogrešno ili više uplaćeni javni prihodi, vraćaju se uplatiocima iz sredstava Budžeta u skladu sa odredbama Pravilnika o načinu uplate javnih prihoda budžeta i vanbudžetskih fondova na teritoriji Federacije BiH („Službene novine Federacije BiH“, broj: 41/09, 46/09,56/09,63/09,77/09,02/10 i 10/10).

Član 20.

Sredstva utvrđena za isplatu naknada za rad u Općinskom vijeću i u radnim tijelima Općinskog vijeća isplaćuju se na osnovu Odluke o naknadama vijećnicima i članovima radnih tijela Općinskog vijeća („Službeni glasnik općine Tuzla“, br. 6/97,10/02 i 12/06), Odluke o naknadama predsjedavajućeg, zamjenika predsjedavajućeg i predsjednika Klubova vijećnika u Općinskom vijeću Tuzla („Službeni glasnik općine Tuzla“ br.8/07) i Odluke o načinu ostvarivanja ušteda u općini Tuzla („Sl.glasnik općine Tuzla“, broj: 10/09).

Član 21.

Sredstva za rad parlamentarnih grupa - klubova vijećnika u Općinskom vijeću Tuzla koriste se u skladu sa važećom odlukom Općinskog vijeća.

Član 22.

Sredstva utvrđena u Budžetu općine Tuzla na pozicijama:

1. Grantovi pojedincima-socijalne jednokratne pomoći,
2. Grantovi pojedincima-jednokratne pomoći korisnicima BIZ-a,

koriste se na osnovu programa, pravilnika, kriterija ili finansijskih planova, koje donosi Općinsko vijeće. Sredstava iz tačke 1. i 2. ovog člana koriste se na osnovu Pravilnika.

Član 23.

Sredstva utvrđena u Budžetu općine Tuzla na pozicijama :

1. Grantovi za raseljena lica-pomoć povratku
2. Stipendije učenicima i studentima,
3. Grantovi neprofitnim organizacijama- sport,
4. Grantovi neprofitnim organizacijama – religija
5. Manifestacije od posebnog značaja za grad (ceremonije, konferencije, kulturni događaji, značajni datumi)
6. Grantovi neprofitnim organizacijama-udruženja, organizacije i fondacije,
7. Grant neprofitnoj organizaciji-Sportski savez općine Tuzla
8. Grantovi za kulturne manifestacije (Ljeto u Tuzli i druge manifestacije)
9. Grantovi za sportske manifestacije
10. Grantovi za zaštitu kulturno historijskog i prirodnog naslijeđa,
11. Grant za tekuće održavanje objekta SKPC „Mejdan“Tuzla
12. Grant neprofitnoj organizaciji SD „Sloboda“Tuzla,
13. Grant neprofitnoj organizaciji KK „Sloboda Dita“Tuzla,
14. Grant za pomoć Fondaciji „Istina-pravda-pomirenje“,
15. Grant- podrška poslovanju RPC Tuzla-„Inkubator Lipnica“,

16. Grant FMRPiO-Podrška unapređenju infrastrukture u RPC Tuzla-Inkubator“Lipnica“
17. Grant neprofitnoj organizaciji- UG“Kuća plamena mira“ Tuzla
18. Grant za JU „Muzej istočne Bosne“Tuzla,
19. Grant za JKP „Vodovod i kanalizacija“ Tuzla (rekonstrukcija, sanacija i izgradnja)
20. Grant za „Centralno grijanje“ Tuzla (rekonstrukcija, sanacija i izgradnja)
21. Grant za Aero-klub Tuzla,
22. Grant UNDP za toplifikaciju u Dragodolu,
23. Grant za učešće u realizaciji Akcionog plana BiH za rješavanje problema Roma,
24. Transfer za rad- Općinsko udruženje samostalnih privrednika,
25. Transfer za rad- Udruženje penzionera općine Tuzla,
26. Transfer za rad- Crveni križ općine Tuzla,
27. Transfer za realizaciju Programa mjera zdravstvene zaštite životinja,
28. Transfer za rad Narodne kuhinje“Imaret“ Tuzla,
29. Transfer za rad- JU „Narodno pozorište“ Tuzla,
30. Transfer za rad- JU Narodna i univerzitetska biblioteka „Derviš Sušić“ Tuzla,
31. Transfer za rad- Međunarodna galerija portreta u Tuzli,
32. Transfer za rad JU „Centar za socijalni rad općine Tuzla",
33. Transfer za rad JU Obdanište "Naše dijete" Tuzla,
34. Transfer za rad JU „Dom mladih" Tuzla,
35. Transfer za rad JU Gradski stadion „Tušanj“
36. Transfer za rad JP „Radio Tuzla“,
37. Transfer za rad organizacija i udruženja iz oblasti BIZ-a,
38. Izdaci za realizaciju manifestacije - Književni susreti „Cum Grano Salis“,
39. Transfer za rad – JP BIT Centar Tuzla,
40. Učešće općine u finansiranju projekata iz oblasti poduzetništva,
41. Učešće općine u razvoju primarne poljoprivredne proizvodnje,
42. Grant za JKP „Komunalac“Tuzla (nabavka kamiona),
43. Grant neprofitnoj organizaciji- KK“Jedinstvo“Tuzla,
44. Grant neprofitnoj organizaciji- UG DVD Gornja Tuzla

koriste se na osnovu odluka i programa raspodjele sredstava za svaku poziciju u ovom članu, usvojenih od strane Općinskog načelnika, a na prijedlog nadležne Službe u skladu sa utvrđenim kriterijima.

O utrošku ovih sredstava nadležne Službe šestomjesečno informišu Općinskog načelnika.

Program raspodjele sredstava za pozicije iz stava 1. ovog člana sadrži slijedeće elemente:

- naziv projekta
- ime korisnika projekta
- visinu i strukturu sredstava za realizaciju projekta
- broj transakcijskog računa korisnika projekta

Član 24.

Sredstva utvrđena u Budžetu općine Tuzla, kao „Kapitalni izdaci“ u okviru Službe za komunalne poslove, izgradnju i poslove mjesnih zajednica - Odjeljenje za komunalnu infrastrukturu, koriste se prema Programu kapitalnih investicija općine Tuzla, usvojenog od strane Općinskog vijeća Tuzla.

Član 25.

Sredstva utvrđena za realizaciju „Grantova neprofitnim organizacijama- udruženja poljoprivrednika“ općine Tuzla, koriste se prema Pravilniku o utvrđivanju postupka i kriterija za dodjelu sredstava namijenjenih za finansiranje udruženja poljoprivrednika („Službeni glasnik općine Tuzla“, broj: 07/05).

Član 26.

Sredstva utvrđena u Budžetu na poziciji „Učešće općine u troškovima postupka pribavljanja odobrenja za građenje korisnika BIZ-a“ koriste se na način propisan Odlukom o subvencioniranju naknade za pogodnost lokacije i troškova u postupku građenja i legalizacije stambenih objekata („Službeni glasnik općine Tuzla“, broj:11/06).

Član 27.

Sredstva za rad organizacija i udruženja iz oblasti boračko-invalidske zaštite sa područja općine Tuzla, koriste se na način propisan Odlukom o uslovima, kriterijima i postupku dodjele sredstava za finansiranje rada i realizaciju programskih ciljeva organizacija i udruženja iz oblasti boračko-invalidske zaštite sa područja općine Tuzla, broj:02-41-741 od 03.02.2010.godine.

Član 28.

Sredstva utvrđena u Budžetu za isplatu naknada za rad stručnih komisija za tehnički prijem objekata, isplaćuju se na osnovu važeće Odluke o naknadi troškova pripreme urbanističke dokumentacije u postupku izdavanja urbanističke saglasnosti i odobrenja za građenje kojom se reguliše ova oblast.

Član 29.

Sredstva utvrđena u Budžetu općine Tuzla u okviru izdataka „Službe za civilnu zaštitu - Sredstva za zaštitu i spašavanje“, koristit će se prema Godišnjem planu korištenja sredstava za zaštitu i spašavanje, koji donosi Služba civilne zaštite uz saglasnost Općinskog štaba civilne zaštite, a transakcije po ovom osnovu vršit će se putem namjenskog transakcijskog računa općine Tuzla, kao podračuna JRT.

Član 30.

U cilju javnosti upravljanja javnim novcem Budžet, Odluka o izvršavanju Budžeta i ostali dokumenti vezano za izvršavanje Budžeta objavljuju se u Službenom glasniku općine Tuzla, u skladu sa članom 76. Zakona o budžetima u Federaciji BiH.

III - FINANSIJSKO IZVJEŠTAVANJE I REVIZIJA

Član 31.

Služba za budžet i finansije dužna je podnositi Općinskom načelniku mjesečne izvještaje o izvršenju Budžeta u roku od najviše 30 dana, a tromjesečne i polugodišnje izvještaje u roku od najviše 60 dana od završetka svakog izvještajnog razdoblja.

Član 32.

Služba za budžet i finansije obavezna je dostaviti Općinskom načelniku Izvještaj o izvršenju Budžeta za prethodnu godinu, a Općinski načelnik je obavezan podnijeti isti Općinskom vijeću na usvajanje u roku od šest mjeseci od završetka fiskalne godine.

IV- KAZNENE ODREDBE

Član 33.

Odgovorno lice budžetskog korisnika, nosilac izvršne vlasti, kao i drugo lice odgovorno za Budžet općine, kaznit će se za kršenje ove odluke saglasno odredbama člana 78. Zakona o budžetima u Federaciji Bosne i Hercegovine („Službene novine Federacije BiH“, broj 19/06,76/08,05/09,32/09 i 09/10).

V- ZAVRŠNE ODREDBE

Član 34.

Na sva pitanja koja nisu regulisana ovom Odlukom, a tiču se načina izrade, donošenja, izvršavanja Budžeta, zaduživanja, duga, računovodstva, nadzora i revizije Budžeta, primjenjivat će se odredbe važećih zakona.

Član 35.

Ova Odluka stupa na snagu danom objavljivanja u „Službenom glasniku općine Tuzla“, a primjenjivat će se za fiskalnu 2010. godinu.

Bosna i Hercegovina
Federacija Bosne i Hercegovine
Tuzlanski kanton
OPĆINA TUZLA
OPĆINSKO VIJEĆE
Broj:01-14-1896-2010
Tuzla, _____ 2010.godine

PREDSJEDAVAJUĆA VIJEĆA

Prof.dr.med.sci. Nada Mladina